

Dörfligeischer 1978

Drissig Johr lang singend pintechehre,
Jedi Fasnacht pünktlech wiederchehre,
Das brucht halt Närve und ou gueti Schueh,
Der Graber und der Brugger hei nach nüün Johr gnue !

Am eidgenössische Hoselüpfen-Reige,
Do möchti ds Fernseh der Hunspi Ruedi zeige,
Der Marti Ernscht, dä möchti das verhindere,
Aber hoppla – und scho hockt är ufem Hingere !

Es flücht der Chevallaz mit Helikopter
Richtig Jura, doch ds Biel bim Parkplatz stoppt är,
Do chunnt mit Rieseschritt der Mandi z' gumpe:
Liebe Bundespapi, cha dir ou nüt pumpe !

Nach der Wäutreis meint bim Interviuw,
Wo me ne frogt, der Jimmy Carter ziemlech schlau:
"Ou wes politisch überhoubt nid besser tuet loufe,
So ha-n-ig ömu mini Nüss chönne verchoufe."

Am Ernscht isch's ärnscht, es geit der Ernstli Brugger,
Zu der Volksbank go schaffe, hol's der Gugger,
Ar hett jo ds Bärn jetz ghörig chönne lehre
Wie me mit fuule Tuure d' Fränkli cha vermehre !

Wär nid bi Kasse isch, so meine mir,
Dä hett kei Gäld, im Bänkler-Jargon : stier !
"Es isch nid schlimm," seit der Bokassa, "mini Fete
Mach ig all' mit Entwickligshilf-Monete !"

Löchli mache mache, grabe, Röhrlig legge,
Strössli offe, Strössli wieder decke,
U wes wie ds Twann bim ARA-Aschluss geit,
Wird nur es Strössli gmacht und ds Röhrlig gar nid geit !

Nach knapp zwöi Johr hei si d' Stämpu-Outomate
Bim Bahnhof wäg gno, worum, heit dir's errate ?
Mir hei uf Flüscherwäge halt vernoh,
Es heig am Gnägi gäng d' Grawatte ine gno !

Mir si jetze ou in Madretsch "in",
Dä Sex-Shop näbem Hundesalon bringt üs Gwinn,
Nur darfsch di de nid i der Tüür trumpiere
Und säge: "tüet mer doch der Fifi kahl rasiere !"

Stadumfahrig, Müra, Volkhuus, Gymi,
Bielerseeschtröss, s'isch gäng glich, läck Jimmy !
Müesse mir ächt no witeri drissig Johr singe,
Bis mer ändlech nöii Bieler Sujet chöi bringe ?